

浙江文叢

柳貫集

〔下冊〕

浙江出版聯合集團
浙江古籍出版社

浙江文叢

柳貫集

〔下冊〕

〔元〕柳貫著 魏崇武 鍾彥飛 點校

浙江出版聯合集團
浙江古籍出版社

柳貫集卷十三 銘

豫章樓銘 有序

江西等處行中書省治龍興，而龍興古揚域，豫章其郡名也。乃泰定四年秋八月甲子，重作南樓于城上，實備雉門之制，題其榜曰『豫章』，以爲治格章明則民胥悅豫，有以靈承上恩。名從其舊，具新義焉。日既南至，大合讌張樂以落之。相臣臨席，賓寮列俎，酒酣歡洽，咸謂新茲傑觀，增壯南服，宜有銘詩昭示永久，則以其辭命貫。貫不敢讓，爲之銘曰：

維星有野，維地有區。九土三條，辨方制隅。揚域入斗，亦禹所敷。春秋戰國，搶裂紛如。中江而西，爰闢邑郭。畫茲豫章，曳楚引吳。漢因秦郡，建侯以居。提封所既，海澨嶺阻。洪始名州，廢郡之餘。雖則分疆^(一)，百雉維都。觀察節度，幢纛麾符。作鎮開藩，列城受呼。守牧之良，若史有譽。宋制遵唐，謀帥選儒。迨更府號，考義則疎。以年而命，稽實本虛。神元應天，統御方輿。既定南紀，旋安里閭。時哉裕宗，正位皇儲。錫是分地，襟江帶湖。世祖有詔，雷行電舒。曰惟龍興，由夫澤蒞。其潛其躍，乾道與俱。異指同音，革之乃孚。遂簡宰臣，建行中書。以張國威，以宣廟謨。亦訓亦齊，無劉無拏。課則民庸，賦則兵車。謹脩侯度，職

貢方輪。富而教之，俗恬以愉。其北柴桑，其南番禺。萬里行涉，不煩戒徒。凡四星終，若閏朝晡。治理之成，一軌無渝。肆今省署，堂昔雌塗。府舍潭潭，孰啟新模。據勢雄尊，象乎紫樞。兩觀之間，有列闔闔。疏爲脩閤，達及交衢。扇燼揚埃，忽不須臾。宰臣曰噫，責其在余。余有兵民，企瞻所於。譬諸服衷，袂則有裾。函書驛聞，報發官帑。大寮部役，令丞具需。陶埴斬材，工來于于。層構勃興，鵬騫蜃嘘。翼翼闌楯，隆隆棟桴。其崇五仞，其廣百膚。上宜綴筵，下可建旗。雲宿藻井，霞飄綺櫺。西山晴翠，時落堦除。如憑廣莫，如挹方諸。湖淥右泛，江瀾左紆。千帆輻集，萬屋鱗鋪。警夜嚴昕，有鼓鐔鈇。有節干掇，有栖漏壺。坐息徙倚，有亭有廬。亦有遊氛，不攘而祛。宰臣來登，稅駕踟躕。曰今高朗，維昔隘沕。匪增匪埤，匪剔匪剗。度不在奢，名不在誣。即榜豫章，在志古初。豈惟志古，示民不迂。爾卜牲釁，爾謀燕胥。我有嘉賓，爾肅以趨。上公維宰，玄袞繡襦。色笑娛賓，其虛其徐。殽載既升，醪漿載斟。吳絲蜀桐，趙玉燕姝。碣極之戲，角觝之夫。次舉交陳，卒徹虞虞。講禮有容，流風四徂。以我豆籩，易彼折爿。聖人設險，有不可踰。域山界谿，猶迹之麓。治在郡縣，謂若蒲盧。古然今否，問牧棄芻。宰臣維垣，志範其驅。大閑克正，小體自紆。繫此江粵，夥民曠墟。八夫四耦，三歲一畬。畝有遺秉，野無逋租。由宰臣賢，仁涵義濡。麟遊鳳鳴，可坐以須。載瞻臺隍，飛閣渠渠。臨茲治城，如承盤盂。由穎陰侯，爰始錡球。歷數千年，考筮應圖。洪惟寶命，天降神扶。赫赫宗支，一本而芻。前星次焉，麗于南弧。熒光所被，川媚壤腴。封建之福，在

德不孤。宰臣作樓，非以聚醕。固國藩墉，有隆無汙。民之戴之，豈樂以訐。陋儒屬辭，實繁且蕪。請命劓工，託諸砮砮。

校勘記

〔一〕『疆』，原誤作『彊』，據續金華叢書本、四庫薈要本改。

拱北樓銘 有序

杭爲江浙行省治所，門雉之制宜壯且麗。蓋吳山橫截治城中，如龍鸞翔集，不崩不騫。舊即東垂築爲門闕，而交衢達于其下。比歲大德己亥，始因宋朝天門遺址，闢隘埠高，冠以飛樓，爲其楹戶之北向也，匾名『拱北』^{〔一〕}，示尊君親上之誠焉。閱三十一年，天曆己巳十月，樓燬。省具聞中書，以爲樓直省東南^{〔二〕}，兵民號令胥此焉出，宜先百役，新茲崇構，以竦視瞻。不踰時，報可。乃以圖畀府，使揆材庀工。梁棟惟良，畚築惟堅。樓成，而枅栱騫飛，堊塗昭煥，加於舊矣。起至順庚午七月，明年九月訖工，凡役工一萬六千六百八十六，縻鈔以錠計一千七百九十有七，米以石計二百九十，其崇□□□□尺，縱廣□□□□尺。視其役者，杭府達魯花赤答里馬思的，涖其成者，行省平章政事易釋重阿公。而左右司都事鄧臣川，實佐經畫。又三年爲歲癸酉，始礪石請文，用著成績。文曰：

皇有九有，洽于大同。基命定命，憲天惟聰。保邦制治，建侯樹公。提封四海，其旅牲牲。堯舜博濟，猶病乎仁。井牧分疆，維以範民。睠茲越吳，寔古南服。闢省命相，江閩併屬。界之嶺海，繚以溪谷。粟米麻絲，鹽鹽茶荈。服器之貢，充牣航輦。歲實王府，有式有典。東南大藩，曰唯錢唐。前臨潮波，四周臺隍。吳山中亘，距奮翼張。有截崔嵬，有崇闔闔。兩觀之間，有閣渠渠。闌檻北嚮，實拱皇都。乃歲己巳，守者弗恪。融風晝揚，焚巢燬作。曾是岌岌，化爲冥漠。宰臣曰吁，天工予代。是心魏闕，無乎不在。一樓之興，民所瞻對。予圖厥新，維時是因。乃度土功，乃發官緡。相彼基構，益之廣輪。其材櫛杉，其飾髹丹。雕櫨繡栢，霧拱雲樂。觚爵騰拏^(三)，如濤湧山。望氣占氛，亦承亦序。壺氏縣壺，鼓人擊鼓。以警昕昏，以戒盧旅。商出于塗，賈藏于市。夷有奉琛，使有結軌。塵海憧憧，覲是瓌美。來游來登，稅于高層。風清瓊宇，星貫玉繩。江湖兩漚，日升月恒。昔在李唐，武勝名軍。揚益次杭，章章有聞。錢氏建國，百年四君。宋初籍土，爰擇牧守。涵育既優，民訖于富。貨資化居，工尚文鏤。燕遊以時，惟豐故豫。築臺構亭，剝巖治圃。騷人墨客，興言能賦。豈若斯樓，雄據高明。不專序賓，不主觀兵。引首北顧，咫尺神京。神京嚴嚴，民環拱之。如轂斯運，我約其軹。如網斯張，我挈其維。庶民惟星，師尹惟日。其分雖殊，其誠克一。左陟右降，如承宥密。斗牛之墟，方半萬里。太微分光，周是四履。宅揆良哉，民胥樂只。上公惟宰，宰士惟僚。寤寐先憂，罔不夙宵。金穰歲兆，玉燭時調。諸侯之門，曰應曰皋。有攢畫戟，有建駢旄。威行令施，無淫

無愠。星河在上，民物在下。樓觀巍巍，有截中夏。侯度克脩，純錫天嘏。嘏吾敢私，爲天子壽。化自此南，實饗實右。勒辭山石，敬拜稽首。

校勘記

〔一〕『匾』，原誤作『篇』，據天順本改。續金華叢書本、四庫薈要本作『扁』。

〔二〕『直』，原誤作『宜』，據天順本、續金華叢書本改。

〔三〕『觚』，原誤作『觚』，據續金華叢書本、四庫薈要本改。

養正堂銘 有序

大興君耶律公作堂于信都私第。比參政江渚行省日，翰林學士承旨趙公爲大書『養正堂』^{〔一〕}，揭之楹間。朝夕觀省^{〔二〕}，有擴充而無懈怠^{〔三〕}，所養所存，顧何嘗不在於斯哉？爲之銘曰：

肖形兩間，莫直匪人。顙圓趾方^{〔四〕}，載以一身^{〔五〕}。爾心之大^{〔六〕}，理勝故純。爾氣之積，志壹故神。承之葆之^{〔七〕}，在識厥初。勿亢以極，勿淪以污。勿舍其車，賁趾而徒^{〔八〕}。勿腊其毒，噬肉及膚。曾是幾微，一動一靜。有順無違^{〔九〕}，曰此成性。函之在中，則莫吾病。惟敬則存，惟怠則騁^{〔一〇〕}。敬怠之分，間不容黍。乃相先民，示爾繩矩。維克端蒙^{〔一一〕}，廓大其宇。不

雕以完，心焉童殺。以之應物，泊無迎將。以之制變，反于真常。繫信都公，含和蓄剛。其發不抑，德盛流光^{〔二〕}。其光既流，內美益充。謂美伊何，養正於中。亦施諸人^{〔三〕}，弗耀而躬。顧瞻堂楣，名昭義豐。我徵其訓，正以受美^{〔四〕}。反正爲非，得正爲是。終日射侯，維鵠斯視^{〔五〕}。君子求仁，侯鵠實似。神聖製字，之與正對。目所擊者^{〔六〕}，道無不在。是心經綸，昭晰勿昧。我銘公堂，以諗諸內。

校勘記

- 〔一〕『承』，原爲墨丁，據天順本、續金華叢書本補。
- 〔二〕『省』，原爲墨丁，據天順本、續金華叢書本補。
- 〔三〕『充』，原爲墨丁，據天順本、續金華叢書本補。
- 〔四〕『顧』，原爲墨丁，據天順本、續金華叢書本補。
- 〔五〕『身』，原爲墨丁，據天順本、續金華叢書本補。
- 〔六〕『爾』，原爲墨丁，據天順本、續金華叢書本補。
- 〔七〕下『之』字，原爲墨丁，據天順本、續金華叢書本補。
- 〔八〕『徒』，原爲墨丁，據天順本、續金華叢書本補。
- 〔九〕『達』，原爲墨丁，據天順本、續金華叢書本補。
- 〔一〇〕『騁』，原爲墨丁，據天順本、續金華叢書本補。

〔一一〕「端蒙」，原爲墨丁，據天順本、續金華叢書本補。

〔一二〕「盛」，原爲墨丁，據天順、續金華叢書本本補。

〔一三〕「施諸」，原爲墨丁，據天順本、續金華叢書本補。

〔一四〕「以」，原爲墨丁，據天順本、續金華叢書本補。

〔一五〕「鵠」，原爲墨丁，據天順本、續金華叢書本補。

〔一六〕「目」，原誤作「日」，據天順本、續金華叢書本改。

蒼劍石銘 有序

越府照磨官林君叔大畜奇石，脩勁秀特，植置官署庭下。嬋貞肖剛，石猶人也〔一〕。予過山陰，見而愛之。乃爲石製號，作《蒼劍石銘》，銘曰：

誰爲龜枿〔二〕，興雲吐霧。誰爲底柱，截波東注〔三〕。誰戮防風〔四〕，骨骸撐拄。有植之脩，非簣非虞。不銖而廉〔五〕，不窺而窳〔六〕。如英瓊瑤，如玉櫺具。既庭既直，亦峻亦武。字之蒼劍，以配寶璐。使鎮郊筵，百神爾主。明德唯馨，式穀是與。

校勘記

- 〔一〕『也』，原爲墨丁，據天順本、續金華叢書本補。
〔二〕『龜枿』，原爲墨丁，據天順本、續金華叢書本補。
〔三〕『注』，原爲墨丁，據天順本、續金華叢書本補。
〔四〕『誰戮防風』，原爲墨丁，據天順本、續金華叢書本補。
〔五〕『銖』，原誤作『鉢』，據續金華叢書本、四庫薈要本改。『廉』，原爲墨丁，據天順本、續金華叢書本補。
〔六〕『窾』，原爲墨丁，據天順本、續金華叢書本補。

辭

陳貞命字祝辭

予友陳君子仁之子貞，冠而筮賓，字曰履元，亦既協於名矣〔一〕。夫元即善也，履之而行，仁智兼用，成己成物之功〔二〕，不其至哉！貞來問義，乃辭而祝之。其辭曰〔三〕：

乾有四德，繫天而行〔四〕。自元以始，歸復於貞。上戴下履，亦順而承。陰陽之際，闔闢升降。剛柔相交，出人相乘。不枯夫氣，不囿夫形。方其既翕，已張其絃。及其遂舒，愈韜其英。春必有夏，久必有徵。使冬不春，沍陰以凝〔五〕。變而適正，化道乃成。體天者人〔六〕，粵惟心

亨^{〔七〕}。仁首四端，與生俱生。生以顯仁，智以藏精。瘁焉枯槁，燁彼春榮。不斂其實，曷邈其萌。不挹其沖，曷就其盈。體驗擴充，一本於誠。悅親信友，已分既明。推之事物，豈有餘贏^{〔八〕}。陳生甫冠，進學烝烝。幼名冠字，字則依名。貞字履元，維以訓程。新新不已，善與元并^{〔九〕}。植本既固，履善無傾。去爾幼志，爾毋矯輕。習爾幼儀^{〔一〇〕}，爾毋近刑^{〔一一〕}。允茲學功，聖猷是經。吾豈蝸蟬^{〔一二〕}，啁啾自鳴。其以予言，質諸禮庭。

校勘記

- 〔一〕『協』，原爲墨丁，據天順本、續金華叢書本補。
〔二〕『己』，原爲墨丁，據天順本、續金華叢書本補。
〔三〕『辭曰』，原爲墨丁，據天順本、續金華叢書本補。
〔四〕『繫』，原爲墨丁，據天順本、續金華叢書本補。
〔五〕『凝』，原爲墨丁，據天順本、續金華叢書本補。
〔六〕『人』，原爲墨丁，據天順本、四庫薈要本補。
〔七〕『亨』，原誤作『享』，據續金華叢書本、四庫薈要本改。
〔八〕『贏』，原爲墨丁，據天順本、續金華叢書本補。
〔九〕『與』，原爲墨丁，據天順本、續金華叢書本補。
〔一〇〕『習』，原爲墨丁，據天順本、續金華叢書本補。

〔一一〕『爾』，原爲墨丁，據天順本、續金華叢書本補。

〔一二〕『吾』，原爲墨丁，據天順本、續金華叢書本補。

鄭泳冠字祝辭

吾里義門鄭氏之老順卿者，吾友也。筮得穆日，始用三加之禮冠其諸孫泳〔一〕，而責之以成人之道焉〔二〕。不鄙戒賓，過采衰陋。夫既與聞酌醴〔三〕，字實予責。予惟泳以潛行爲義，潛行乎大川而涉其津涯，有從容暇豫之意，無造次急遽之容，古人每以適道譬之，有自來矣。而順卿又方敦泳以學，予聞諸《易範》，潛之爲用，不既大哉？乃爲製其字曰『仲潛』，復申其義，爲辭祝之。既以承順卿閑家之美，而又以觀泳之績，于其成者，固在乎此。辭曰：

古人重冠，維以責成。其成謂何？反身而誠。忠君信友，事親從兄。由乎仁義，至於踐形。三加有禮，禮不虛行。筮賓命字，爲敬其名。爾生鄭泳，早嘗受經。未離幼志，已及弱齡。淪設筵弁首，古訓是程。吾觀於水，析義甚精。水圓以折，流而不盈。自夫發坎，達于四溟。淪而爲潔，瀦而爲榮。剡舟任載，僅若浮罍。負羽不勝，由弱故傾。柔而能剛，孰與水爭？知其性者，不將不迎。潛泳其間，維順之承。過涉必滅，浚恒匪貞。譬如學功，蓄能致亨。自強不息，宵寐夙興。雖泳于涯，實游于明。弗心之潛，則冥于升。咨爾生泳，學維烝烝。辰哉不競，逝波日驚。晦用遵養，魄將載營。潛之昭之，泰道之征。徵諸《易範》，本之性情。字爾仲潛，

戒爾矯輕。非伏於潛，欲抵其平。滄浪之歌，有濯斯纓。爾慎持之，如承佩珩。爾世孝義，視爾門旌。黍稷維微，神歆德馨。由微至著，有聞無聲。棄爾孩孺，揚爾翹英。式祇訓辭，以無忝所生！

校勘記

- 〔一〕『三』，原爲墨丁，據續金華叢書本、四庫薈要本補。『泳』，原爲墨丁，據天順本、續金華叢書本補。
- 〔二〕『人』，原爲墨丁，據天順本、續金華叢書本補。
- 〔三〕『與聞』，續金華叢書本、四庫薈要本作『席開』。按，此二字天順本漫漶不清。

贊

姚文公畫象贊〔一〕

祐治之間，三宗繼體。公如景星，光于五緯。燕許常楊，時乎並世。藻火人文，咸韶帝制。廟社巍巍，風清日麗。上方倚公，公則歸矣。被髮騎麟，視世糠粃。陟降洋洋，繫公不死。有肅容儀，瞻者敬止。

校勘記

〔一〕『畫』，原誤作『書』，據天順本、續金華叢書本改。

王叔能參政畫像贊

身廊廟而心山林，學孔顏而志皋益。生色維仁義之形，充體皆盛大之積。此所以爲命世之寶龜、陳序之弘璧也〔一〕。

校勘記

〔一〕『璧』，原誤作『壁』，據續金華叢書本、四庫薈要本改。

王繼學畫像贊

粹然冰玉之英，展也皇風之瑞。用則盛之鸞臺鳳閣，不用則置之朱崖儋耳。老智慮於多艱，觀夷險於一致。固將挾玉局之飛仙，以游夫鴻濛溟滓之際。所謂瑯琊之宗、魯公之子而盛德之世者也。

韓明善畫象贊

融液粹和，淳涵清淑。繫道而道日以光，藝仁而仁至於熟。乃所謂畫錦之旂常，有衍宗

支；蓬萊之雲氣，舒爲篇目。宜其表盛德之流滋，集斯文之胡福。我觀之人，式如金玉。

自贊畫像

好學而莫或致之，望道而未之見也。壯而漫仕，初何與乎尊榮；老而歸休，亦焉往而不得乎貧賤也？若乃企卒歲之優游，服終身之靜儉，則拄笏而看山，飲水而著書，尚庶幾可以傲兀夫無窮之世變也。

箴

思學齋箴 有序

清河張生受經于高陽先生^(二)，得其端緒，而能益致思勉之功，可謂善學者矣。予以『思學』名其講肄之齋，而箴以發之。其辭曰：

心外無學，學原於思。思而有得，乃驗於爲。仁陽義陰，理公己私。克復往來，敬義夾持。權之有要，心實制之。堯舜與人，同此秉彝。勿謂凡民，雖聖可希。而況學者，執復有機？是故君子，學如恐違。方其未思，戒爾外馳。如止水源，不波不隨。及其既思，毋惑多岐。必端

其趨，必底于夷。若執權量，以計毫釐。若引圭臬，以奠方維。克審夫是，勿置爾疑。思學之功，本末相資。學而不思，如御舍綏。思而不學，如行無齋。明善擇善，真致其知。進德脩業，行見於施。下學上達，在爾孳孳。思誠而誠，夫何遠而？悅親信友，讀書誦詩。涵養擴充，罔或弗祗。縑以藉玉，綱以襲衣。緝是內美，暢於四支。維敬之與，維德之儀。彼暴棄者，志遁神離。以其邪思，果於自欺。弗踐其形，禽獸紳綏。五三載籍，典訓具貽。後儒翼傳，秒忽無遺。精義妙道，日曜月輝。思之而至，主善爲師。吾黨張氏，嗜善如飴。學于高陽，涉其津涯。亦既勤止，牧之愈卑。日引月長，晝思夕惟。爰闢齋居，以燕以頤。榜曰思學，名言在茲。若工有箴，予爲之辭。學思自彊，庶幾緝熙。

校勘記

〔一〕『生』，天順本、續金華叢書本作『翼』。

傳

劉節婦傳

劉節婦徐，小字柔嘉，婺蘭溪人。家爲大姓，世有顯者。節婦生二十七年，歸同郡金華劉

似之。似之六世從祖諱渭，宋嘉定庚辰對策集英殿，賜進士第一，在州里尤爲望家。節婦歸，閱再期，孕而未育，似之遽疾死。及產男也，節婦泣誓曰：『幸哉，劉氏之宗弗墜已！吾有二心，何以見君地下？』言訖，復哽咽。於是，劉氏家益落，節婦惡筭疏服，常如初喪，而所以承祭祀、脩饋饗與出賦租以保門戶者，悉身自任之，不使有違節愆度。字其子潛，自始學至于成人，爲之聘舅女而女焉。生二子一女，而潛得年二十六，亦竟卒。姑婦相向哭，期以死守全劉氏家。雙杼寒梭，一燈夜績，卧起相依，攻苦彌厲。然取其紡織之贏以供鹽醢，亦常若有裕。久之，潛所遺二子滋、蕤，蕤有立，而女已有從。姑能以節義自持，易奢爲儉，而婦又以順正率禮成教，劉氏之稱爲望家者，茲可以自靖於其先矣。

節婦今年七十一，嫠居且四十三年，而婦寡亦十又七年。予與節婦居異縣，不相聞。有友葉君謹翁故與似之交，而潛及其二子城、城又嘗從之問學，知節婦凡行尤稔，數數爲予言之。蓋歎世有旌復之典，而人無自鬻之心，若節婦之遭變罹憂，鞠窮艱苦，斯已甚矣，不惟飭諸其躬而已，信又能使一介弱婦毅然相從於茹荼食蓼之中，比之再造其家，功豈少哉？嗟乎！節婦之名，人固不樂得之，而世固偏予之者，閔之深而美之至也。今予所稱劉節婦，行未采於風人，名未登於策牘，予獨予之以是名而不疑者，稽之里黨之論而斷以史氏之法，壹是人心天理之公，而何私之有？然則世鑒雖或不明，而人心之昭灼，悌而未昧，彼詫節稅之麗而侈閎閎之崇，以爲節婦之得傳顓顓藉是，亦惑之甚矣，予竊卑之。作《劉節婦傳》。